

Preghera

Pisassi una matina
È di
Tè, ci vecu

Pisassi una matina
È di
Tè, viaghju

Pisassi una matina
È di
Tè, sentu

Pisassi una matina
È di
Tè, parlu

Pisassi una matina
È di
Sò in salute

Pisassi una matina
È di
Amu

Pisassi una matina
È di
Sò liberu

Chjinassi una sera
È di
Grazie
Aghju campatu



Aspettavamu l'inguernu è cun i mio cumpagni straziavam u qualchì stonda per vince u nostru pane. À l'epuca ùn sapia perchè si muvianu tantu i soffii suprani. Ben ch'abbia sempre ascultatu è traduttu i lagni di a natura cum'è tanti malanni, à issi ghjorni guardava u celu, anonimu testimone persi à u pede d'una caserna scola cum'è tant'altri fratelli d'esiliu.

*I ghjorni sempre dolci d'un estate
chì si stinza fin'à u pienu vaghjime.*

Ottobre

E frache brusgianu
E so ultime stonde
Anu betu u sole
Chì dà culori novi
È ballanu à u trattu
D'ottobre chì si move
In issu vaghjime chjaru
Cum'un zitellu chì dorme
Una telata appesa
In un scornu di caminu
Duie legne infiarate
È un ragnu chì mira
Una donna chì pensa
À i so ultimi solli
Cum'è in tante case
Ghjè vaghjime chì dorme
U sole lampu
I so pisticiuli d'oru
Muneta ghjittata
Chì brusgia e mani
Banditi sullati
Martiri o eroi
Sott'à celu turchinu
Ci hè vaghjime chì corre
Dui tiglioli
Custodii sereni
Tenenu aperta
A strada di l'avvene
Vestuta di fronde
D'un tempu cascatu
È per tanti figlioli
Ghjè vaghjime chì schiatta

